



ՎԱԽՃԱՆՎԵՑ ՀՆԴԻԿ ՄԱԼԱԲԱՐ ԵԿԵՂԵՑՈՒ ԿԱԹՈՂԻԿՈՍ ԲԱՍԻԼԻՈՍ ՄԱՐ ԹՈՄԱ ՄԱԹԵՈՍ Բ-Ն

Նորին Սրբություն Բասիլիոս Մար Թոմա Մաթեոս Բ-ն ծնվել է 1915 թ. հունվարի 30-ին Կերալայի Կոլամ շրջանում: Սովորել է տեղի դպրոցում, որն ավարտելուց հետո ուսանել է Քոթայամի հին ճեմարանում և Փաթանամթիտայի Բազիլ Դայարա ուսումնական հաստատությունում: Այնուհետև ուսումը շարունակել է Կալկաթայի Եպիսկոպոսական քոլեջում: Աստվածաբանական բարձրագույն կրթությունը ստացել է Նյու Յորքի Ընդհանուր Աստվածաբանական ճեմարանում:

1938 թ. ձեռնադրվել է սարկավագ, իսկ 1941 թ.՝ քահանա, արդեն այդ ժամանակ աչքի ընկնելով հոգևոր առաջնորդի իր ունակություններով, ուստի Նորին Սրբությանն անվանում էին «Հայր Հրեշտակ»:

Նորին Սրբություն Բասիլիոս Գիվարգեզ Բ Կաթողիկոսը 1953 թ. մայիսի 15-ին 38-ամյա Հայր Մատթեոսին ձեռնադրում է եպիսկոպոս:

Լինելով Կոլամի թեմի Մետրոպոլիտը՝ Նորին Սրբությունը կարճ ժամանակահատվածում ծխերի թիվը համարյա կրկնապատկում է, վերաբացվում են մի քանի վանքեր: Նորին Սրբությունը մեծ դեր է խաղացել նաև ուսման և սոցիալական ծառայության ոլորտում. իր անմիջական վերահսկողության և առաջնորդության ներքո բացվել են մի քանի վարժարաններ, դպրոցներ, հիվանդանոցներ և այլ հասարակական հաստատություններ:

1991 թ. ապրիլի 29-ին Փարումալայի ճեմարանում տեղի ունեցավ Նորին Սրբություն Բասիլիոս Մար Թոմա Մաթեոս Բ-ի գահակալության արարողությունը: Նորին Սրբությունը Ս. Թովմայի Աթոռի 89-րդ գահակալն է և վեցերորդ կաթողիկոսը 1912

թ. Մալանկարայում Կաթողիկոսության հիմնադրումից հետո: Որպես Մալաբար Ուղղափառ Եկեղեցու Պետ՝ Կաթողիկոսը երկու տիտղոս ունի՝ «Արևելքի Կաթողիկոս» և «Մալանկարայի Մետրոպոլիտ»:

Կաթողիկոսը եպիսկոպոսներ է օծում Արևելքի Ուղղափառ Եկեղեցու համար, նախագահում է Եպիսկոպոսների խորհուրդը, հայտարարում է խորհրդի որոշումների մասին և հետևում, որպեսզի դրանք գործադրվեն: Որպես Սինոդի ներկայացուցիչ՝ Հնդիկ Մալաբար Եկեղեցում ևս կաթողիկոսին է վերապահված Մյուռոնի օրհնությունը:

Վերջին տարիներին երջանկահիշատակ Կաթողիկոսի նախաձեռնած որոշ ծրագրեր կարևոր նշանակություն ունեցան ներհամայնքային կյանքում. աղքատներին օթևան տրամադրելու նպատակով սկսվեց տնաշինության ծրագիրը, ոչ ունևոր աղջիկների ամուսնության համար հաստատվեց համապատասխան հիմնադրամ: Լինելով Կերալայի Էկումենիկ Կոմիտեի, ինչպես նաև զանազան այլ միջեկեղեցական կոմիտեների նախագահ՝ Նորին Սրբությունն իրեն դրսևորել է որպես գերազանց առաջնորդ: Նորին Սրբությունը մշտապես կապի մեջ էր քույր Եկեղեցիների, ինչպես նաև տարբեր կրոնների առաջնորդների հետ և իր գործունեությամբ ցույց էր տալիս, թե քրիստոնյա Եկեղեցու պետն ինչ դեր պետք է ունենա Հնդկաստանի հասարակական կյանքում՝ նպաստելով ներհամայնքային ներդաշնակության և երկրում խաղաղության ամրապնդման գործին:

Նորին Սրբությունը լավ հռետոր էր, ճանաչված գիտնական և աստվածաբան, կարող առաջնորդ և Աստծո խոսքի քարոզիչ: